

# АКАФИСТ СВЯТЫМ ПЕРВОВЕРХОВНЫМ АПОСТОЛАМ ПЕТРУ И ПАВЛУ

## Кондак 1

Избранныи проповедницы Агнца Непорочнаго, за ны закланнаго, Христа Бога, преславнии апостоли Петре и Павле! Яко Боговедением концы мира озарившии и обильно струями благодати напоившии, и ныне с любовию призрите на чтущия усердно память вашу. Исполните нас духа премудрости, сердца наша верою утвердите, да непрестанно благодарственная вам поем, со умилением зовуще: Радуйтесь, святии первоверховнии апостоли Петре и Павле.

## Икос 1

Ангели благовестницы явистесь на земли, апостоли Петре и Павле блаженнии, зане от Самаго Виновника спасения нашего на делание ваше призвани бывше, широту всея земли обтекосте, иудеом и еллином Христа распятаго, Божию Силу и Божию Премудрость проповедающе. Темже и мы, светом учений ваших озаряеми, сердцем и усты взываем к вам сицевая: Радуйтесь, звезды светозарныя, от востока возсиявшия и всем людям путь ко Христу показавшия; радуйтесь, Церкви Христовы утверждение и столпи непоколебимии. Радуйтесь, власть вязати и решити грехи наша от Христа приемшии; радуйтесь, во святых писаниих ваших к вере и упованию на Бога вся ны призывающии. Радуйтесь, в житии вашем образы обращения согрешающим явившии; радуйтесь, высоту любве истинныя словом и делом нам показавшии. Радуйтесь, святии первоверховнии апостоли Петре и Павле.

## Кондак 2

Видя тя, апостоле Петре, на море Галилейстем вкупе со Андреем, братом твоим, вметающа мрежи, Господь рече вам: грядита по Мне, и сотворю вы ловца человеком. И абие, оставльше мрежи, по Нем идосте. Темже, красото Церкви вселенския, сотвори и нас предстательством твоим скорым быти на делание заповедей Божиих, косны же ко греху, да, злобою младенствующе, достигнем вси в меру возраста мужа совершенна, поюще Богови: Аллилуиа.

## Икос 2

Разум Божественный освети тя, Павле, избранный сосуде Божий, егда, ревнуя о отеческих преданиих, шествовал еси в Дамаск гонити Церковь Христову. Тогда бо внезапно сияние Славы Господни облиста тебе и глас бысть с Небесе: Савле, Савле, что Мя гониши? Ты же, аще зрением плотским омрачился еси, но духом узрел еси Силу и Славу Христа распята, тьму просвещающа и любовию Церковь Свою созидающа, и того ради пленился еси духом, покаяние и послу-

шание нося и глаголя: “Господи, что сотворю?”. Посем, восприим жребий апостольства от руки Господни и крещение водою и Духом от Анании блаженнейшаго, явился еси предивно сосуд избранный благодати и свидетель немолчный Спасителя нашего, от Негоже и мы, просвещаемии, пети тебе навыкохом сицевая: Радуйся, светлосте церковная, от Света Неизреченнаго на пути пречудно во откровение языков возжженная; радуйся, знамения Силы Божия в житии твоём чудно явивый и тем уста непокоривым на веки заградивый. Радуйся, сосуде избранный, меньша от апостол и перваго от грешник себе сокрушенно нарекий; радуйся, якоже Херувим тайнозритель, даже до третияго Небесе верою и любовью вознесенный. Радуйся, якоже Серафим пламенный, ревностию по Бозе непрестанно снедаемый и истаеваемый; радуйтесь, Павле и Петре, благовестия трубы громогласныя, основания ветхаго мира, якоже Иерихон вторый сокрушившия. Радуйтесь, святии первоверховнии апостоли Петре и Павле.

### **Кондак 3**

Сила Вышняго, в немощех познаваемая, излия на тя, Павле, адаманте веры, благодать на благодать, зане неложно исповедал еси: Вся могу о укрепляющем мя Иисусе. И воистинну проповедал еси Евангелие во явлении Духа и силы, творя великая и неизреченная, славная же и ужасная, яко неведущии Бога Боговедению научахуся, сердца ожесточенная елеом милосердия напаяхуся и вся овцы расточенныя во ограду Пастыря Единого отвсюду стекахуся, Емуже и пети согласно научишася: Аллилуиа.

### **Икос 3**

Имея дерзновенную любовь ко Господу, шествовал еси, Петре, по водам воздвигаемым, яко по суху. Но аще и потоплением был еси устрашаем и сомнением обуреваем, не потопился еси в пучине, понеже простерл еси руке и очи ко Спасу, вопия Ему из глубины сердечныя: Господи, спаси мя. И в той час руку помощи восприял еси от Христа, Избавителя нашего. Тако и мы в сей юдоли земней, бедами устрашаемы и волнами страстей потопляемы, взирающе на течение твое, к тихому пристанищу добре нас наставляющее, благодарственно воспеваем ти сице: Радуйся, камению веры многоценный, от Камене Краеугольна избранный и утвержденный; радуйся, храме Духа Святаго, многообразными дарованьми от Того преизрядно украшенный. Радуйся, рыбарю препростый, премудрости Божия исполненный, ейже от человек никтоже противитися может; радуйся, самовидче величия Божия, паче царей и славных земли от Господа на вся веки прославленный. Радуйся, хартие одухотворенная, в нюже огненными писмены слово Божие вписася, радуйся, с Павлом апостолом светило равночестное и незаходимое. Радуйтесь, святии первоверховнии апостоли Петре и Павле.

### **Кондак 4**

Бурю лютых искушений воздвиже древле човекоубийца, искони иский Церковь Божию потребити и ученики Спасовы, якоже пшеницу, разсеяти: но

Господь молился о тебе, Петре, да не оскудеет вера твоя. И тако, от Спаса просвещаем и от Него в немощи укрепляем, воистинну сокрушил еси челюсти вражия и обращающа утвердил еси братию твою, поя Богу: Аллилуиа.

#### **Икос 4**

Слышаще, Павле премудре, о дивнем избрании твоём, во еже возвестити имя Господа Иисуса народом и царем и сыном Израилевым, и видяще тя в слове, в житии, в любви, в душе, в вере, в чистоте, якоже света языком во спасение их поставлена, невернии верою просвещахуся, вернии же, ликовствующе, Господа прославляху. Темже и мы, сорадоватися заповедь приемше, приносим ти гласом радования таковая: Радуйся, верный служителю Христов, вся славная мира якоже сор и прах вменимый и всем себе поработивый Христа ради и Евангелиа; радуйся, добрый воине Христов, во вся оружия Божия облеченный и вся языки в послушание Христово покоривый. Радуйся, жертво приятнейшая, Христу сораспеншаяся, Христа ради по вся дни умирати приобыкшая; радуйся, сеятелю слезами многими, узнице и исповеднице преславный, язвы Господа Иисуса Христа на теле твоём радостно носивый. Радуйся, славо и похвало Церкви Вселенския, позорище миру бывый, глад, жажду, наготу, биение и поругание за Христа многочастне претерпевый; радуйтесь, Павле и Петре, апостолов украшение, миру благовестницы, Церкви утверждение. Радуйтесь, святии первоверховнии апостоли Петре и Павле.

#### **Кондак 5**

Боготечная звезда явился еси, Павле, егда течение твое, пресветло начен от Дамаска, даже до Рима простерл еси и якоже прежде звезда от восток научи волхвы кланятися Солнцу Правды, сице и ты, Богомудре, путь ко Христу показал еси всем, хотящим достигнути спасения, взывая со дерзновением многим: подражатели мне бывайте, якоже и аз Христу. Емуже и пети научил еси нас едиными усты: Аллилуиа.

#### **Икос 5**

Видев на горе Фаворстей Славу Единороднаго от Отца, одяна Светом, яко ризою, хотяща же за ны облещися в ризу поругания, глагола еси, Петре, Иисусови, провидя Славу несказанную искупленных Кровию Агнца Непорочна Христа: Господи, добро есть нам zde быти. Сего ради и мы, роди дальнии, лишени чистоты светозарных, аще и недостойни суще, обаче твоим ангельским гласом призывании к наследию нетленну, чисту, неувыдаему, соблюдаему на Небесех, якоже общницы хотящей открытися Славе, воспеваети ти сице: Радуйся, блаженне, от Присносущных Истины достойно “блажен” нареченный; радуйся, бисере предобрый, от Господа при езере обретенный и светом от Света осиянный. Радуйся, от Самаго Искупителя рода человека на проповедь Евангелия посланный; радуйся, воистинну ловец человеков явивыйся, ты бо, якоже и прежде, благодатию влечеши души омраченныя в чудный Свет Христа Бога. Радуйся, источнице животворный, от Источника жизни вечныя истекий и от богатства

даров Духа Святаго жаждущия души напоаяй; радуйтесь, Петре и Павле, якоже Серафими шестокрилатии, у Престола Царя Славы парящии и ко свету Тайн Божиих приницающии. Радуйтесь, святии первоверховнии апостоли Петре и Павле.

### **Кондак 6**

Проповедник немолчен и по смерти твоей, Петре Богоносне, явился еси, зане с неба мысленнаго, якоже гром таинственный, о звании христианством многообразичне напоминаеши. Мы же, ведяще любовь твою николиже отпадающе и молитву о нас непрестанно у Престола Божия деему, поем сердцем умиленным: Аллилуиа.

### **Икос 6**

Возсиял еси, Павле великоимените, знаменми и чудесы вскоре, отнележе Дух Святыи во Антиохии повеле ти начати превеликое служение апостола языков: таже, достиг Кипра, Елимы волхва зрение омрачил еси и Сергия проконсула светом истины озарил еси. Сподоби и нас, света сего причащшихся, прославити дивная дела твоя в песнях и пениях духовных и воспевати тебе таковая: Радуйся, свете сердец кротких и разумных, яже, яко доилица, грееши и пестунствуеши писаньми твоими Богодухновенными; радуйся, жезле наказания, сосуды лжи и лести до конца сокрушаяй, сердца же сокрушенная на недвижимый Камень Веры ввоздвизаяй. Радуйся, Христово Евангелие в себе воплотивый и сего ради превыше видимых вознесенный и прославленный; радуйся, уста медоточная, радость многую апостолом и верным возвестившая, яко отверзе тобою Господь дверь спасения всем языком. Радуйся, ревнителю по Бозе, новый Илие, не на чуждем основании созидаваяй и ревностию твоею страны дальния обтекааяй; радуйтесь, Павле и Петре, весь мир между вами разделившии, во еже овому убо быти апостолу языков, другому же проповедати народу избранному. Радуйтесь, святии первоверховнии апостоли Петре и Павле.

### **Кондак 7**

Хотя истину утвердити и мир Церкви оградити, пришел еси, Павле, поборниче правды, во святыи град, в немже на собрании святых апостол и верных свидетельствовал еси вкупе с Петром и Варнавою, яко Дух Святыи дышет, идеже хочет, даруя благодать Свою к независтно иудеом и еллином обрезанным и верую вся спасая, а не мертвенными делы ветхаго закона. И тако воистинну вси вернии, свободу и мир получивше, союзом любве связуеми, благодарственно воспевают Богови: Аллилуиа.

### **Икос 7**

Новаго Архангела, провозвестника тайны, от века сокровенная, избра ты, апостоле Петре, Господь, егда вопроси ученики Своя: вы же кого Мя глаголете быти? Ты же, от Отца Небеснаго просвещаем, возвестил еси несомненное осно-

вание нашей веры, глаголя ко Спасу: ты еси Христос, Сын Бога Живаго. Того ради и мы, чтущие тя, яко Надежду нашего спасения неприкровенно исповедавши, взываем ти таковая: Радуйся, Синаю новый, скрижаль спасения людем ясно показавый и свободу во Христе возвестивый; радуйся, первоположенный от Архитектона Небеснаго каменю веры и ис-поведания, на немже Церковь Христова неборимо основася. Радуйся, первопоставленный вратарю входа райскаго, емуже перве обещаеся Господь дати ключи Царствия Небеснаго; радуйся, судие праведный, имый судити с прочими апостолами обеманадесяте коленом Израилевома. Радуйся, яко очеса и утеса твоя блаженная Христа Спаса нашего, Егоже лицезрети пророцы пламенне желашу, во плоти суца на земли видеша и слышаша; радуйтесь, Петре и Павле, имущии ноги благовествования краснейшия и сердца освященная, вы бо Евангелию послужисте и евангельски пожисте. Радуйтесь, святии первоверховнии апостоли Петре и Павле.

### **Кондак 8**

Странное чудо и неудобь разумеваемое явился еси, Петре, мудрствующим земная, яко незнатна мира и уничижена избра тя Господь, и посрамил еси мудрья, одолел еси царства, привел еси сонмы омраченных ко Свету Истины, и донныне, якоже столп огненный, озаряеши вся земнородныя, указуя несомненный путь во блаженное отечество. Сего ради, богатству благодати в тебе дивящися, поем Богу: Аллилуиа.

### **Икос 8**

Всем был еси вся, Павле, любовию всех объемля, словом спасения дальних и ближних достигая, верою вся превозмогая: зане и в Филиппех, мир благовествуя, аще и палицами биен был еси люте и в темницу во оковах ввержен, но воспел еси тамо вкупе с Силою песнь чудную хвалы и благодарения Богу, Иже и возгреме рабом Своим трусом велиим, яко и основания темничная поколебашася и двери отверзошася. Мы же, видяще тя, премудре, тьму узилища светом Боговедения озаряюща и свободу о Христе узником подающа, воспеваем ти сицевая: Радуйся, узнице Христов, темницу во храм пре-творивый и узами твоими демонов цепи людем разрешивый; радуйся, сильне, немощи немощных понесый, не себе, но ближним угождати иский. Радуйся, пречудне, узами и скорбьми хваливыйся, радоватися с радующимися и плакати с плачущими научивый; радуйся, умерый греху, но присно живой Богови, тебе бо жизнь Христос и смерть приобретение. Радуйся, образе неусыпнаго делания, задняя забываяй, в предняя простираяйся и всем помышлением к почести вышняго звания текий; радуйтесь, Павле и Петре, даже до смерти мученически Господу послужившии и сею, яко венцем, подвиг ваш венчавшии. Радуйтесь, святии первоверховнии апостоли Петре и Павле.

### **Кондак 9**

Вся ко Христу приводя, возвестил еси, Павле, во Афинех мнящимся мудрым быти Премудрость, свыше сходящую, да, ведяще суетная, отселе уведят

Бога, невидимаго им, и осяжут Его, о Нем бо живем и движемся и есмы. Темже и мы, благодатию неизреченною разум истины восприемще и сердцем неложно, яко благ Господь, постигше, поем Ему верою твердою, якоже перстом от Фомы, осязуему: Аллилуиа.

### **Икос 9**

Ветийствовати не можаше язык человекь, егда Господь Сил нозе рабом Своим умываше и лентием отираше. Ты же, Петре, страхом побеждаем, аще возгласил еси: не умыеши ногу моею во веки, но абие весь в послушание предложил еси, егда услышал еси глагол, реченный от Господа: аще не умою тебе, не имаша части со мною. И тако всем сердцем возопил еси: Господи, не нозе мои токмо, но и руце, и главу. Мы же, ведяще тя в сих, якоже злато во огни искушения, очищаема и познавающе от смирения к послушанию восхождение твое, таинству Божия Промышления поклоняющесе, воспеваем ти сердцем смиренным таковая: Радуйся, Петре, очеса орля, имиже зрел еси Солнце Правды — Христа Бога, Иуде нозе умывшаго и от него лобзанием лукавым преданнаго; радуйся, на веки уневестивыйся Христу, ты бо, Агнцу Непорочну, якоже агнец, последуя, до заклания твоего верность соблюл еси. Радуйся, углю неугасимый, от жертвенника Небеснаго огнем любви Божественныя непрестанно объятый; радуйся, светильниче горяй и светяй, роды родов светом правды озаряй. Радуйся, грозде многообильный винограда Христова, на радость мира многопечального возвращенный; радуйтесь, Петре и Павле, Христа Бога в себе верно вообразившии. Радуйтесь, святии первоверховнии апостоли Петре и Павле.

### **Кондак 10**

Спасения во Христе неизследимую пучину и покаяния многую силу явил еси в себе, Петре, егда трикраты по предреченному отверглся еси Господа: не вем Человека сего! Егда клялся и ротился еси во дворе архиереа, но абие, вспомняув глагол Иисусов, вне текл еси, плачяся горько. Мы же, умильне взирающе на пресветлый сей образ сокрушения, в научение и обличение жестоковыйных сердец наших дарованный, поем Господу, паки дивно возвеличившему тя: Аллилуиа.

### **Икос 10**

Стена и оружие непобедимое был еси, Павле, противу миродержителей тьмы века сего, яко и царство их в Коринфе, Ефесе и инех градах вселенныя сокрушил еси, тьму многобожия разгоняя и разум истины утверждая. Ты бо неложно показался еси Божий слуга в терпении мнозе, в скорбех, бедах, в теснотах, в ранах, темницах, в нестроениях, трудех, во бдениях, в пощениях, яко и ум наш недоумеет изрещи богатство доброты твоея, деннонощныя подвиги со слезами многими. Того ради, зряще море любви твоея, дерзающе молим: услыши нас, убогих грешными усты глаголющих сицевая: Радуйся, умерый греху благовестниче непобедимый, яко в тебе первее ветхаго человека победив, Христу сораспялся еси; радуйся, учителю многоплодный и волков хищных обличителю,

яко тобою образ верным показал еси, присно бодрствуя и научая вся сугубо: словом и житием по слову. Радуйся, всех обогатителю, яко, прежде сам обнищав и ничтоже имый, вся содержал еси; радуйся, о христианех пламенный ревнителю, обручивый я Христу, яко деву чисту непорочную невесту. Радуйся, утробе многоболезненная бывый о чадах твоих в муках рождения, дондеже вообразится в них Христос; радуйтесь, Павле и Петре, в Дусе единице согласная во едином граде верность Христу кровию запечатлевшии. Радуйтесь, святии первоверховнии апостоли Петре и Павле.

### **Кондак 11**

Пети и убожати узы и страдания твоя, Павле многострадальне, достойно есть, яко токмо в терпении мнозе, но и с радостию предреченный ти от Агава пророка узы восприял еси, и Церкви Кесарийстей свидетельствовал еси сице: не точию связан быти готов есмь за имя Господа Иисуса. Емуже и мы, дивному во святых Своих, поем песнь: Аллилуиа.

### **Икос 11**

Светом радости неизреченныя и Божественныя любве осиян был еси, Петре, егда Господь по воскресении первее прочих апостол явися тебе, скорбевшему. По сих же паки явлься, Владыка жизни вопроши ты трикраты: Симоне Ионин, любиши ли Мя? Ты же, огнем Божественныя любве опаляем, отвещал еси тепле: Господи, Ты веси яко люблю Тя. Того ради и мы, обнищавшии духом, помянувше преизобильныя токи слез и любве твоя, ихже ради воззва тя Господь на прежний степень апостольства, благоговейне взываем ти сицевая: Радуйся, учителю покаяния, слезами горькими высоту смирения стяжавый и Воскресшим от гроба к радости неизглаголанней на веки приобщенный; радуйся, премудрости глупино, смиренномудрия высоту, пламеню любве, образ жития всем верным себе явивый. Радуйся, друже Господа Иисуса, иго благовестия ревностно понесый, над наследием Божиим господствовати не восхотевый, но послушанию властем научивый; радуйся, апостоле Христов, мудрость змиину и чистоту голубину в себе сочетаваый и образом смерти твоя на кресте крайнее смиренномудрие показавый. Радуйся, рабе Господа верный, умноживый данный тебе талант и в радость Господа вшедый; радуйтесь, Петре и Павле, сердца не тесная, весь мир любовию вместившая и концы вселенныя просветившая. Радуйтесь, святии первоверховнии апостоли Петре и Павле.

### **Кондак 12**

Благодать Духа Утешителя, изливавшаяся на главы верных во образе языков огненных, скоро излилася изо уст твоих, Петре, глаголом огненным, во еже благовестити с силою многою Христа распята не точию погибшим овцам дому Израилева, но и язычестей неплодящей церкви, да плодоносит и сия Богу не тленый крин чистоты и покаяния. Испроси и нам, апостоле достоблаженне, милость Господа, творящаго тобою великая и чудная, рукою твоею мертвыя

воскрешающая и смертью твоею на кресте мертвенную любовь нашу воспламеняющая, да непрестанно поем Ему: Аллилуиа.

### **Икос 12**

Поюще пресветлую память твою, Павле, достойно ублажаем неизреченныя подвиги, болезни и труды, яже во бдениих, во алчбе и жажде, в пощениих, в зиме и нагоде понесл еси. Кто бо изочтет раны, скорби и беды твоя во градах, в пустыни, в мори, беды от разбойник, беды от сродник, беды от язык и лжебратии? Кто подобен тебе? Паче всех апостол потрудился еси. Темже молим: не возгнушайся нас, грешных, молящихся тебе, но якоже всем был еси вся, и ныне услыши немощным гласом приносимая ти сицевая: Радуйся, узниче Христов, из темницы свет распространивый, словом и посланием во узах много потрудивыйся, зане воистинну слово Божие не вяжется; радуйся неизследимая пучино любви, по братии твоей отлучен быти от Христа приискренне восхотевый. Радуйся, подвижниче предивный, подвигом добрым подвизавыйся, течение совершивый и кровию твоею Церковь украсивый; радуйся, источаяй море чудес, яко главоотяжи и убрусцы твои недуги исцеляху и демоны прогоняху. Радуйся, любви Божия неразлучный причастниче, Горняя мудрствуяй, а не земная, зане и от плоти разрешитися и со Христом быти возжелал еси; радуйтесь, Павле и Петре, веры христианския насадители, благочестия водами напоителие и ко пристанищу вечному вернии водителие. Радуйтесь, святии первоверховнии апостоли Петре и Павле.

### **Кондак 13**

О всехвальнии благовестницы Петре и Павле! Внемлите воздыханием сердец наших, молящиеся за ны, много бо может молитва праведных пред Богом: потщитесь и ныне воспоминати нам о небеснем звании и христианстей кончине жизни нашея, привлецыте нас ко сладости евангельския истины, свяжите узами любви Христовы, да мы вси, отвергшеся нечестия и мирских похотей, внидем в радость Господа нашего, поюще Ему со Ангелы и с лики святых: Аллилуиа.

**(Этот кондак читается трижды, затем икос 1 и кондак 1)**